

Na osnovu člana 55. stav (2) Zakona o organizaciji organa uprave u Hercegovinačko – neretvanskom kantonu („Službene novine HNK“, broj: 9/09) i člana 28. stav (4) Zakona o koncesijama Hercegovinačko-neretvanskog kantona („Službene novine HNK“, broj: 1/13,7/16 i 6/18), ministar privrede Hercegovinačko-neretvanskog kantona donosi

P R A V I L N I K

o prijedlogu, dokumentaciji i postupku za dodjelu koncesije za obavljanje elektroprivredne djelatnosti proizvodnje, prijenosa i distribucije električne energije izgradnjom elektroenergetskih objekata instalisane snage od 23,1 kW do 5 MW putem samoinicijativne ponude

POGLAVLJE I - OPĆE ODREDBE

Član 1.

(1) Ovim Pravilnikom propisuje se sadržaj prijedloga, dokumentacija i postupak za dodjelu koncesije za obavljanje elektroprivredne djelatnosti proizvodnje, prijenosa i distribucije električne energije izgradnjom elektroenergetskih objekata instalisane snage od 23,1kW do 5 MW osim proizvodnje električne energije za vlastite potrebe putem samoinicijativne ponude na području Hercegovinačko-neretvanskog kantona.

(2) Objektima za proizvodnju električne energije, u smislu ovog Pravilnika, smatraju se:

- a) Postrojenja za pretvaranje pogonske snage vjetra u električnu energiju instalisane snage od 23,1 kW do 5 MW po instalisanoj jedinici;
- b) Postrojenja za pretvaranje energije sunca u električnu energiju instalisane snage od 23,1 kW do 5 MW;
- c) Kogeneracijska postrojenja instalisane snage od 23,1 kW do 5 MW.

(3) Objektima za proizvodnju električne energije, u smislu ovog Pravilnika, ne smatraju se objekti za proizvodnju električne energije za vlastite potrebe.

POGLAVLJE II - PRIJEDLOG ZA DODJELU KONCESIJE

Član 2.

(1) Prijedlog za dodjelu koncesije podnosi se na obrascu koji se nalaze u prilogu ovog Pravilnika i čine njegov sastavni dio, i to:

- a) Obrazac 1. Prijedlog za dodjelu koncesije za elektroenergetske objekte iz člana 1. ovog Pravilnika.
- b) Obrazac 2. Prijedlog za dodjelu koncesije za elektroenergetske objekte iz člana 62a. Zakona o koncesijama Hercegovinačko-neretvanskog kantona.

Član 3.

(1) Prijedlog za dodjelu koncesije smatra se podnesenim dostavljanjem popunjenog obrasca za dodjelu koncesije u pisanoj formi neposredno Ministarstvu privrede ili putem pošte, a može se poslati i faksom ili elektronski.

(2) Ukoliko se Prijedlog za dodjelu koncesije šalje elektronski, Ministarstvo privrede je dužno o prijemu istog obavijestiti podnosioca Prijedloga bez obzira da li je isti tražio potvrdu o prijemu, te nakon što podnosilac prijedloga primi ovo obavještenje, Prijedlog se smatra dostavljenim Ministarstvu privrede.

(3) Obrazac Prijedloga za dodjelu koncesije koji se podnosi neposredno Ministarstvu privrede zajedno sa pratećom dokumentacijom mora biti ovjeren i potpisan od podnosioca prijedloga, odnosno od njegovog zakonskog zastupnika ili ovlaštenog opunomoćenika.

(4) Obrazac Prijedloga za dodjelu koncesije i prateću dokumentaciju koja se podnosi faksom ili elektronskim putem podnosilac Prijedloga dužan je dostaviti najkasnije u roku od sedam dana od dana dostave faksom ili elektronski.

(5) Prateća dokumentacija se podnosi u originalu ili ovjerenoj fotokopiji ne starijoj od tri mjeseca računajući od dana podnošenja Prijedloga.

Član 4.

Uz prijedlog za dodjelu koncesije, podnosi se dokumentacija kojom se dokazuje ispunjenost uslova koji se odnose na: ekonomske, finansijske, socijalne, stručne i tehničke pokazatelje, kao i uticaj radova i objekata na životnu sredinu, a čije ispunjenje je neophodno za dodjelu predmetne koncesije.

POGLAVLJE III – DOKUMENTI KOJI SE PODNOSE UZ PRIJEDLOG ZA DODJELU KONCESIJE

Član 5.

(1) U prilogu prijedloga za dodjelu koncesije koja se odnosi na elektroenergetske objekte iz člana 1. Pravilnika podnosi se slijedeća dokumentacija :

a) Opći podaci o podnosiocu prijedloga za dodjelu koncesije:

- 1) za domaće ili strano pravno lice izvod iz sudskog registra sa upisanim šiframa djelatnosti koje se odnose na obavljanje energetske djelatnosti (proizvodnja, prijenos i distribucija električne energije), a za fizičko lice koje obavlja registrovanu obrtničku djelatnost izvod iz registra nadležnog organa.
- 2) Uvjerenje o poreznoj registraciji;
- 3) Uvjerenje o registraciji obaveznika poreza na dodanu vrijednost (ukoliko je obaveznik po Zakonu o porezu na dodanu vrijednost);

b) Ekonomski pokazatelji:

- 1) Studija ekonomske opravdanosti.

c) Finansijski pokazatelji:

- 1) Potvrda banke ili druge finansijske institucije da podnosilac prijedloga za dodjelu koncesije raspolaže potrebnim finansijskim sredstvima ili dokument kojim se potvrđuje spremnost banke ili druge finansijske institucije da će podnosiocu prijedloga obezbijediti potrebna finansijska sredstva za realizaciju predmeta koncesije;
- 2) Bilansa stanja i Bilansa uspjeha za posljednje tri godine (za društva koja posluju manje od tri godine, potrebno je dostaviti minimalno posljednji Bilans stanja i Bilans uspjeha); specifikacija za utvrđivanje dohotka od samostalne djelatnosti - (za fizička lica);
- 3) Potvrda/uvjerenje nadležnog poreskog organa o redovnom plaćanju poreza i doprinosa;
- 4) Potvrda/uvjerenje nadležnog organa o izmirenim obavezama na osnovu PDV-a (ukoliko je obaveznik po Zakonu o porezu na dodanu vrijednost);
- 5) Dokaz o izmirenim obavezama po osnovu plaćanja koncesijske naknade za predmet koncesije iz člana 1. stava (1) ovoga Pravilnika ukoliko je podnosilac prijedloga za dodjelu koncesije već ranije imao zaključen ugovor o koncesiji odnosno ovjerenu izjavu podnosioca prijedloga za dodjelu koncesije ako u prethodnom periodu nije imao zaključenih ugovora o koncesiji.

d) Dobar ugled podnosioca prijedloga:

- 1) Uvjerenje nadležnog suda da podnosilac prijedloga i odgovorno lice u njemu nije osuđivano za krivično djelo u prethodnih pet godina od podnošenja prijedloga za dodjelu koncesije;
- 2) Uvjerenje nadležnog suda da podnosilac prijedloga ni(je) pod stečajem ili likvidacijom (ukoliko je društvo pod stečajem, dužno je dostaviti usvojen plan reorganizacije društva i dokaz da je na dan otvaranja stečajnog postupka imalo više od 100 zaposlenika);
- 3) Uvjerenje nadležnog organa unutrašnjih poslova da odgovorno lice nije osuđivano za krivična djela.

e) Stručna i tehnička osposobljenost podnosioca prijedloga za dodjelu koncesije:

- 1) Prikaz zaposlenih stručnih radnika i njihovih referenci i opreme kojom podnosilac prijedloga raspolaže.
- 2) Lista referenci podnosioca prijedloga za dodjelu koncesije (prikaz izgrađenih postrojenja odnosno projekata u razvoju u posljednjih pet godina).
- 3) Izvještaj o istraživanju energetske resursa (za energetske objekte iz člana 1. stav (2) tačka a) Pravilnika).

f) Podaci o zemljištu:

- 1) Zemljišnoknjižni izvadak, kopija katastarskog plana i posjedovni list za parcelu na kojoj će se vršiti izgradnja energetskog objekta;
- 2) Za energetske objekte iz člana 1. stav (2) tačke a) i c) ovog Pravilnika, grafički prilog na topografskoj karti u mjerilu 1:25.000 u kojem je podnosilac prijedloga utvrdio minimalan potreban neprekinuti prostor razvoja projekta odnosno poziciju na kojoj se planira izgraditi energetski objekt u geodetskim tačkama (x koordinata u smjeru sjevera, y koordinata u smjeru istoka, te koordinata z (nadmorska visina) ukoliko je poznata);
- 3) Urbanistička saglasnost za izgradnju energetskog objekta (sa klauzulom pravosnažnosti);
- 4) Okolinska dozvola za izgradnju energetskog objekta za objekte iznad 150kW (sa klauzulom pravosnažnosti);
- 5) Dokaz da je podnosilac prijedloga za dodjelu koncesije regulisao imovinsko-pravne odnose sa vlasnikom zemljišta na kojim će se obavljati koncesija (ukoliko se radi o zemljištu u privatnom vlasništvu) .

Član 6.

(1) U prilogu prijedloga za dodjelu koncesije koja se odnosi na elektroenergetske objekte iz člana 62a. Zakona o koncesijama Hercegovačko-neretvanskog kantona podnosi se slijedeća dokumentacija

a) Opći podaci o podnosiocu prijedloga za dodjelu koncesije:

- 1) za domaće ili strano pravno lice izvod iz sudskog registra sa upisanim šiframa djelatnosti koje se odnose na obavljanje energetske djelatnosti (proizvodnja, prijenos i distribucija električne energije), a za fizičko lice koje obavlja registrovanu obrtničku djelatnost izvod iz registra nadležnog organa;
- 2) Uvjerenje o poreznoj registraciji;

- 3) Uvjerenje o registraciji obaveznika poreza na dodanu vrijednost (ukoliko je obaveznik po Zakonu o porezu na dodanu vrijednost);

b) Ekonomski pokazatelji:

- 1) Studija ekonomske opravdanosti.

c) Finansijski pokazatelji:

- 1) Izjavu o strukturi finansiranja izgradnje energetskog objekta;
- 2) Bilansa stanja i Bilansa uspjeha za posljednje tri godine (za društva koja posluju manje od tri godine, potrebno je dostaviti minimalno posljednji Bilans stanja i Bilans uspjeha); specifikacija za utvrđivanje dohotka od samostalne djelatnosti - (za fizička lica);
- 3) Potvrda/uvjerenje nadležnog poreskog organa o redovnom plaćanju poreza i doprinosa;
- 4) Potvrda/uvjerenje nadležnog organa o izmirenim obavezama na osnovu PDV-a (ukoliko je obaveznik po Zakonu o porezu na dodanu vrijednost);
- 5) Dokaz o izmirenim obavezama po osnovu plaćanja koncesijske naknade za koncesije iz člana 6. stav (1) ovog Pravilnika ukoliko je podnosilac prijedloga za dodjelu koncesije već ranije imao zaključen ugovor o koncesiji odnosno ovjerenu izjavu podnosioca prijedloga za dodjelu koncesije ako u prethodnom periodu nije imao zaključenih ugovora o koncesiji.

d) Dobar ugled podnosioca prijedloga:

- 1) Uvjerenje nadležnog suda da podnosilac prijedloga i odgovorno lice u njemu nije osuđivano za krivično djelo u prethodnih pet godina od dana podnošenja prijedloga za dodjelu koncesije;
- 2) Uvjerenje nadležnog suda da podnosilac prijedloga ni(je) pod stečajem ili likvidacijom (ukoliko je društvo pod stečajem, dužno je dostaviti usvojen plan reorganizacije društva i dokaz da je na dan otvaranja stečajnog postupka imalo više od 100 zaposlenika)
- 3) Uvjerenje nadležnog organa unutrašnjih poslova da odgovorno lice nije osuđivano za krivična djela.

e) Podaci o zemljištu:

- 1) Zemljišnoknjižni izvadak, kopija katastarskog plana i posjedovni list za parcelu na kojoj je izgrađen energetski objekat;
- 2) Za energetske objekte iz člana 1. stav (2) tačke a) i c) ovog Pravilnika, grafički prilog na topografskoj karti u mjerilu 1:25.000 u kojem je podnosilac prijedloga utvrdio minimalan potreban neprekinuti prostor razvoja projekta odnosno poziciju na kojoj je izgrađen energetski objekat u geodetskim tačkama (x koordinata u smjeru sjevera, y koordinata u smjeru istoka, te koordinata z (nadmorska visina) ukoliko je poznata);
- 3) Energetska dozvola, dozvola za izgradnju objekta, upotrebna dozvola i dozvola za rad u zavisnosti od stepena ishodovanja zakonom propisane dokumentacije;
- 4) Okolinska dozvola za izgradnju energetskog objekta za objekte iznad 150 kW (sa klauzulom pravosnažnosti).

Član 7.

U svrhu utvrđivanja osnovanosti prijedloga za dodjelu koncesije, može se tražiti i dostava drugih dokaza.

Član 8.

(1) Ako se nakon zaprimanja prijedloga za dodjelu koncesije, utvrdi da uz prijedlog nije dostavljen neki od dokumenata iz člana 5., 6. i 7. ovog Pravilnika, Ministarstvo će pozvati podnosioca prijedloga da u roku od najduže 90 dana dostavi potrebni dokument.

(2) Dužina roka iz stava (1) zavisi od vrste dokumenta koji nedostaje, o čemu odlučuje Ministarstvo, u svakom konkretnom slučaju.

(3) Ukoliko podnosilac prijedloga, u ostavljenom roku, ne dostavi traženi dokument, prijedlog za dodjelu koncesije će se odbaciti o čemu će se podnosiocu prijedloga dostaviti obavještenje.

Član 9.

Studija ekonomske opravdanosti je pisani projekat o stepenu tehničko-tehnološke, socijalne, pravne i ekonomske opravdanosti dodjele koncesije, a koja sadrži slijedeće podatke:

- a) uvod (ciljevi investiranja, osnovni podaci o investitoru i autorima studije, kratak prikaz osnovnih elemenata i rezultata studije opravdanosti);
- b) opis predmeta koncesije (prostorna lokacija predmeta koncesije, funkcija predmeta koncesije, značaj predmeta koncesije u sistemu ili mreži, planirani vijek projekta);
- c) analizu i ocjenu razvojnih mogućnosti investitora (analiza dosadašnjeg razvoja i prognoza budućeg razvoja-tehnologija, tržište, organizacija, kadrovi, podaci o poslovanju, ulaganjima i dr.);
- d) analizu tržišta (osnovne karakteristike proizvoda ili usluga, analiza ponude i potražnje, procjena moguće prodaje i prodajnih cijena);
- e) prikaz generalnog projekta i tehničko-tehnoloških rješenja - prikaz idejnih rješenja (prikaz izrade generalnog projekta, osnovnih elemenata generalnog projekta, tehničko-tehnološka rješenja iz generalnog projekta (arhitektonsko, građevinsko, tehnološko, mašinsko, elektro i dr.);
- f) analizu nabavnog tržišta (specifikacija i opis potrebnih inputa, analiza i mogućnosti nabavke potrebnih inputa, ocjena mogućnosti supstitucije potrebnih inputa, prognoza nabavnih cijena);
- g) prostorni i lokacijski aspekt (usaglašenost sa prostornim i urbanističkim planovima, posljedice raseljavanja i eksproprijacije, prostorne posljedice razdvajanja cjeline, uticaj na prostorni i urbanistički razvoj područja, analiza mikrolokacije, izbor i ocjena podobnosti mikrolokacije);
- h) analizu životne sredine i zaštite na radu (analiza lokacije, ocjena i izbor lokacije, analiza i mogućnosti uticaja na životnu sredinu, prijedlog mjera zaštite životne sredine, ocjena ekološke podobnosti, analiza uticaja proizvodnje na radnike, prijedlog mjera zaštite na radu);
- i) analizu organizacijskih i kadrovskih aspekata.
- j) analizu izvodljivosti i dinamike realizacije projekta (analiza mogućnosti izvođenja projekta, faze izvođenja projekta, terminski plan realizacije projekta, dinamika ulaganja bazirana na terminskom planu, dinamika ulaganja po namjeni, organizacija i sistem upravljanja projektom);
- k) ekonomsko-finansijsku analizu (proračun potrebnih ulaganja u stalna i obrtna sredstva, izvor finansiranja i obaveze prema izvorima, projekcija bilanse stanja i bilanse uspjeha, novčanog toka, ekonomski i društveni tok projekta);
- l) ocjena projekta (finansijska (komercijalna) ocjena sa pokazateljima efikasnosti i opremljenosti, neto sadašnje vrijednosti, interna stopa rentabilnosti, period povrata uloženog kapitala, procjena likvidnosti i društvena ocjena);
- m) ocjena u uslovima neizvjesnosti (procjena praga rentabilnosti, analiza osjetljivosti, analiza vjerovatnoće);
- n) zaključna razmatranja.

POGLAVLJE IV - POSTUPAK

Član 10.

- (1) Za razmatranje prijedloga za dodjelu koncesije i dokumentacije dostavljene u prilogu istog, Ministar privrede Hercegovačko-neretvanskog kantona rješenjem imenuje Komisiju.
- (2) Komisiju čine četiri člana i to stručna lica iz oblasti: elektroenergetike, mašinstva, ekonomije i prava.
- (3) Svaki od članova Komisije, prijedlog i dokumentaciju iz stava (1) ovog člana razmatra u okviru svojih stručnih znanja i kvalifikacija.
- (4) Rješenjem iz stava (1) ovog člana propisuju se poslovi i zadaci svakog od članova Komisije.
- (5) O svom radu Komisija vodi Zapisnik.

Član 11.

- (1) Svaki od članova Komisije će shodno članu 10. stav (3) i (4) ovog Pravilnika pristupiti utvrđivanju pokazatelja iz člana 4. ovog Pravilnika.
- (2) Komisija će izraditi Izvještaj o sadržaju dostavljene dokumentacije koji će sadržavati slijedeće:
 - a) informaciju o potpunosti dokumentacije,
 - b) informaciju da je dokumentacija formalno ispravna (da je dostavljena u originalu ili ovjerenoj fotokopiji - ne starije od 3 mjeseca),
 - c) informaciju o urednoj registraciji podnosioca prijedloga,
 - d) informaciju o raspolaganju ili mogućnošću obezbjeđenja finansijskih sredstava potrebnih za realizaciju predmeta koncesije,
 - e) informaciju o podacima iz Bilanse stanja i Bilanse uspjeha podnosioca prijedloga,
 - f) informaciju da li podnosilac prijedloga redovno izmiruje svoje poreske obaveze, doprinose za PIO/MIO i zdravstveno osiguranje,
 - g) informaciju da li podnosilac prijedloga redovno plaća koncesijske naknade (ukoliko je već imao ili ima zaključen ugovor o koncesiji),
 - h) informaciju da li je podnosilac prijedloga i odgovorno lice osuđivano za krivično djelo,
 - i) informaciju da li je podnosilac prijedloga pod stečajem ili likvidacijom (ukoliko je otvoren stečaj, informaciju o tome da li je usvojen plan reorganizacije društva i da li je na dan otvaranja stečajnog postupka imalo više od 100 zaposlenika),
 - k) informaciju o izvršenom istraživanju energetskih resursa (za energetske objekte iz člana 1. stav (2) tačka a) Pravilnika),
 - l) informaciju o zemljištu koje je predmet koncesije,
 - m) informaciju o tome da li je podnosiocu prijedloga izdan a urbanistička saglasnost i okolinska dozvola za izgradnju energetskog objekta koji će se graditi na zemljištu koje je predmet koncesije.
 - n) Energetska dozvola, dozvola za izgradnju objekta, upotrebna dozvola i dozvola za rad u zavisnosti od stepena ishodovanja zakonom propisane dokumentacije za elektroenergetske objekte iz člana 7. Pravilnika.
 - o) Informacija o prihvatljivosti studije ekonomske opravdanosti.

- (3) Izvještaj iz člana 13. stav (2) ovoga Pravilnika sa Prijedlogom za dodjelu koncesije sa priložima, Komisija će dostaviti ministru, a u cilju davanja mišljenja i provođenja procedure iz člana 28. Zakona o koncesijama Hercegovačko-neretvanskog kantona.

Član 12.

- (1) Ukoliko se u Izvještaju o sadržaju dostavljene dokumentacije utvrdi da dostavljenom dokumentacijom nije dokazano ispunjenje uslova iz člana 4. ovog Pravilnika, Ministarstvo će o tome obavijestiti podnosioca prijedloga sa pozivom da u roku od najduže 90 dana od dana prijema obavještenja dostavi dokumente kojim će dokazati ispunjenje uslova za dodjelu koncesije.
- (2) Dužina roka iz stava (1) zavisi od vrste dokumenta koji nedostaje, o čemu odlučuje Ministarstvo, u svakom konkretnom slučaju.

(2) Rok iz stava (1) može se produžiti za dodatnih 30 dana, ukoliko podnosilac prijedloga podnese zahtjev za produženje tri dana prije isteka roka, iz stava (1) ovog Pravilnika.

(3) Ukoliko podnosilac prijedloga u ostavljenom roku ne dostavi dokumentaciju kojom se dokazuje ispunjenost uslova iz člana 4. Pravilnika, postupak za dodjelu koncesije će se okončati, o čemu će se podnosiocu zahtjeva dostaviti obavještenje.

POGLAVLJE V - PRELAZNE I ZAVRŠNE ODREDBE

Član 13.

Svi postupci za dodjelu koncesije koji su započeti prije donošenja ovog Pravilnika, završiti će se prema odredbama ovog Pravilnika.

Član 14.

Danom stupanja na snagu ovog Pravilnika prestaje da važi Pravilnik o prijedlogu dokumentaciji i postupku za dodjelu koncesije u državnoj svojini za izgradnju novih i rekonstrukciju postojećih objekata za proizvodnju električne energije i izgradnju novih i rekonstrukciju postojećih objekata za proizvodnju električne energije na tom zemljištu ili izgradnju novih i rekonstrukciju postojećih objekata za proizvodnju električne energije na privatnom zemljištu, putem samoinicijativne ponude ("Službene novine HNK", broj: 5/14, 9/16).

Član 15.

Ovaj Pravilnik stupa na snagu osmog dana od dana njegovog objavljivanja u „Službenim novinama HNK“.

Bosna i Hercegovina
Federacija Bosne i Hercegovine
Hercegovačko-neretvanski kanton
Ministarstvo privrede

M i n i s t a r

Broj: _____
Mostar, **2018. godine**

Željko Laketić